

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 231427 23 St
Zenica, 14.10.2024. godine

Općinski sud u Zenici, stečajna sutkinja Sanja Pavliću stečajnom postupku nad društvom „S.R.C.A.“ d.o.o. Olovo, ul. Ajdinovići b.b. Olovo, Olovo, koga zastupa zastupnik po zakonu direktor Nihad Helać, odlučujući o prijedlogu za provođenje stečajnog postupka nad imovinom navedenog privrednog društva predlagatelja Procredit Bank d.d. Sarajevo, ul. Franca Lehara bb, Sarajevo, koga zastupa punomoćnik Diana Dočkal, advokat iz Sarajeva, van ročišta, dana 14.10.2024. godine, donio je sljedeće:

R J E Š E N J E

Pokreće se prethodni postupak radi utvrđivanja uvjeta za otvaranje stečajnog postupka nad stečajnim dužnikom „S.R.C.A.“ d.o.o. Olovo, ul. Ajdinovići bb Olovo.

Za privremenu stečajnu upraviteljicu imenuje se Selma Vranac, ul. Gornje Rosulje 44, Visoko.

Privremena stečajna upraviteljica dužan je:

- utvrditi da li postoje razlozi i uslovi za otvaranje i vođenje stečajnog postupka, te podnijeti izvještaj sudu u roku od 30 dana,
- utvrditi da li je stečajni dužnik odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti,
- obezbijediti imovinu i starati se o imovini dužnika,
- izvršiti pregled dužnikovih poslovnih prostorija i izvršiti uvid u poslovne knjige i dokumentaciju dužnika,
- ispitati da li imovina stečajnog dužnika može pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka,
- dužna je da stečajnom sudiji položi račun i podnese izvještaj o svom radu za period privremene uprave.

Privremena stečajna upraviteljica dužna je podnijeti pismeni izvještaj ovom sudu u roku od 30 dana od imenovanja u kojem će izvjestiti sud o poduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje izgledi da se poslovanje stečajnog dužnika u cjelini ili u pojedinim dijelovima može nastaviti, te je dužna dostaviti izvještaj o okolnostima iz člana 63. stav 7. Zakona o stečajnom postupku.

Mjere pojedinačnog prinudnog izvršenja pokrenute protiv stečajnog dužnika se obustavljaju, a izlučna i razlučna prava povjerioci ne mogu ostvariti u prethodnom postupku.

Povjerioci stečajnog dužnika se pozivaju da privremenoj stečajnoj upraviteljici bez odgađanja saopšte koje mjere obezbjeđenja buduće stečajne mase na predmetima imovine stečajnog dužnika oni zahtijevaju.

Rješenje će biti objavljeno na oglasnoj tabli suda, web stranici Općinskog suda u Zenici, na Internet stranici FIA-e i u „Službenim novinama F BiH, te će se dostaviti Odjeljenju registra ovog Suda, Zemljišno-knjižnom uredu Općinskog suda u Visokom i Službi za katastar nekretnina Općina Olovo, radi upisa zabilježbe pokretanja prethodnog postupka.

O b r a z l o ž e n j e

Predlagatelj Procredit Bank d.d. Sarajevo je dana 17.06.2023. godine, putem punomoćnika, ovom sudu podnio prijedlog za otvaranje stečajnog postupka nad imovinom društva „S.R.C.A.“ d.o.o. Olovo, ul. Ajdinovići bb Olovo, u kojem kao razlog pokretanja stečajnog postupka navodi da su računi društva blokirani, da je isto platežno nesposobno, da ne može izvršiti svoje obaveze, te predlaže da sud postupi u skladu sa Zakonom o stečaju.

Stečajni sudac nakon što je utvrdio da je prijedlog za pokretanje stečajnog postupka podnesen od strane ovlaštenog predlagatelja u smislu odredbe člana 58. stav 2. Zakona o stečaju („Službene novine F BiH“, broj: 53/21) i da je isti dopušten, rješenjem od 03.11.2023. godine, naložio podnositelju prijedloga da uplati novčana sredstva na ime predujma financiranja troškova prethodnog postupka radi utvrđivanja uvjeta za otvaranje stečajnog postupka, temeljem čl. 60. Zakona o stečaju, a predlagatelji su u ostavljenom roku izvršili uplatu sredstava potrebnih za financiranje prethodnog postupka.

Na ročištu za saslušanje stečajnog dužnika od 15.05.2024. godine, isti je izjavio da se protiv prijedloga za otvaranje stečajnog postupka iz razloga što prijedlog ne sadrži uvjete propisane čl. 58. stav 3. Zakona o stečaju F BiH, odnosno da predlagatelj nije dokazao postojanje potraživanja koja su predmet spora pred ovim Sudom, tako da isti nije ovlašten za podnošenje prijedloga za otvaranje stečajnog postupka.

Na osnovu dokumentacije priložene uz prijedlog za otvaranje stečajnog postupka i to aktuelnog izvoda iz sudskog registra privrednih subjekata i druge priložene dokumentacije, predlagatelj je učinio vjerovatnom platežnu nesposobnost.

Navode stečajnog dužnika koji se odnose na ovlaštenje predlagatelja za podnošenje prijedloga i uslove propisane čl. 58. st. 3. Zakona o stečaju F BiH sud je cijenio neosnovanim iz sljedećih razloga:

Predlagatelj je uz prijedlog Sudu dostavio dokumentaciju koju čini i fotokopija protesta zbog neisplate mjenice broj AF7724947 od 19.05.2020. godine, protestirana kod Općinskog suda u Visokom pod brojem 41 0 V 086825 21 V od 18.03.2021. godine, a koja je dospjela na plaćanje dana 27.01.2021. godine. Iz sadržaja iste vidljivo je da je protupredlagatelj „S.R.C.A.“ d.o.o. Olovo dužan predlagatelju Procredit Bank d.d. Sarajevo isplatiti iznos od 150.889,61 KM uz zakonsku zateznu kamatu. Nadalje, za podnošenje prijedloga za otvaranje stečajnog postupka ovlašteni su stečajni dužnik i svaki povjerilac koji ima pravni interes za provođenje stečajnog postupka prema članu 58. st. 2. Zakona o stečaju F BiH, a u konkretnom slučaju iz podnesene dokumentacije, naročito Potvrde o ostatku duga od 12.06.2023. godine izdate od strane ProCredit banke d.d. Sarajevo iz koje proističe da dug S.R.C.A. d.o.o. na dan 12.06.2023. godine iznosi 153.807,91 KM.

Pored toga, Zakon o stečaju F BiH zahtijeva niži stepen dokazanosti, odnosno obavezu predlagatelja da svoja potraživanja učini vjerovatnim, pa shodno tome na osnovu podnesene dokumentacije i sadržaja iste, predlagatelj je potraživanja učinio vjerovatnim.

Na osnovu podnesene dokumentacije, sud nije u mogućnosti da sam procijeni postojanje svih neophodnih uvjeta koje Zakon o stečaju predviđa za otvaranje stečajnog postupka, pa se temeljem odredbe člana 61. ovog Zakona donosi rješenje o pokretanju prethodnog postupka radi utvrđivanja uvjeta za otvaranje stečajnog postupka nad dužnikom i u tom pravcu imenuje privremenog stečajnog upravnika, sa liste stečajnih upravnika, te istom nalaže da izvrši sve radnje navedene u izreci ovog rješenja, a sve u skladu sa članom 63. Zakona o stečaju.

Na osnovu iznesenog, a primjenom navedenih propisa, odlučeno je kao u izreci rješenja.

PRAVNA POUKA:
Protiv ovog rješenja u skladu sa odredbom
čl.23 Zakona o stečaju nije dozvoljena žalba.

STEČAJNA SUTKINJA
Sanja Pavlić